

Minister Otmar Oduber ta mustra con Gobierno ta traha hunto den mesun direccion

Adkision di San Nicolas Store ta complementa e vision di haci di San Nicolas e di dos capital turistico di Aruba



Adkision di San Nicolas Store, ta complementa e vision di haci di San Nicolas e di dos capital turistico di Aruba. Esey ta palabranan di Minister Otmar Oduber, kende a indica cu Gabinete Mike Eman ta traha hunto den e mesun direccion. E mandatario a indica cu e ta sumamente contento cu e adkision di San Nicolas Store dor di Monumentenzorg cu lo wordo restaura den su gloria y asina e keda cla lo ta e cas di e Community Museum, un proyecto cu a incia aña pasa na momento cu Minister Oduber a bishita e Museo di Antigüedad situa na Dakota caminda cu por a aprecia un coleccion sumamente valioso di artefactonan antiguo di Aruba. E exposicion aki tabata tuma luga na e propio cas di famia Odor y tabata

sosode solamente dos biaha pa aña. For di e momento ey e mandatario a indica cu un inventario asina mester haya un otro forma di exposicion, unda e lo tin espacio pa mas hende por disfruta di dje, nos comunidad y nos turistanan pa nan mira di unda nos balornan ta sali y con nos a lanta y ta e nacion cu nos ta awe. Asina, despues di un aña di conversacion cu Minister di Cultura Michelle Hooyboer-Winklaar y Minister di Finanzas Mike de Meza a logra pa conhuntamente cu Fundacion Museo Aruba, habri un otro atraccion pa tanto local como turista na San Nicolas. Minister Oduber for di prome instante a pensa riba San Nicolas pa bin cu e museo, presentando un otro atractivo pa

duna e parti pariba di nos isla mas forza pa atrae turistanan.

E herencia di nos historia ta importante pa e comunidad local, como tambe pa e experiencia unico di nos bishitantenan pa conoce mas di nos cultura y di nos antepasado. Minister Oduber pa e motibo aki ta honra loke

ta di nos y kier salvaguardia e unico Museo di Antigüedad di Aruba. Pa logra esaki a uni forza cu Fundacion Museo Aruba pa aloca un parti di e coleccion di Sr. Odor den e San Nicolas Community Museum. Minister Otmar Oduber ta sumamente orguyoso di por contribui di e forma aki, pa medio di e fondonan di mehoracion di producto Aruba (TPEF), cu desaroyo di nos cultura, herencia y tradicionnan na San Nicolas. Adkision di San Nicolas Store como un edificio di antaño y yen di historia pa bira e cas di e Community Museum sigur ta contribui grandemente na e vision di haci di San Nicolas e di dos capital turistico di Aruba, caminda lo resalta e parti cultural, historico y nos herencia, cual ta factornan

cu e turistanan di awendia ta buscando mas y mas. “E miho, e unico luga cu ta conta cu tur e caracteristanan aki den su totalidad ta San Nicolas y vision di mi persona y di henter Gabinete Mike Eman ta pa haci di dje nos di dos capital turistico, cu tur e aspectonan positivo cu esaki ta trece cune. Hopi trabounan a wordo haci caba,

pero ainda falta y riba esey nos ta enfocando na e momentonan aki. Mi ta sigur cu contando cu e sosten di nos hendenan nos lo sa di logre tambe, na bienestar di no solamente nos hendenan di San Nicolas y vecindario, pero di henter Aruba”, Minister Otmar Oduber a duna di conoce.